

錢匪紀略

劉祝封

金錢會匪始於咸豐初年有趙啓者平邑錢倉人也年二十餘設
飯舖於其鄉善技擊結交皆拳勇輩遇貧乏則贈以資財以是名
震江南北漸至閩疆亡命之徒往依者衆人皆稱趙大哥至八年
有繆元者善望繪有膽力平時喜讀英雄書傳八月十五夜夢天
懸二月次早往問趙啓啓曰兩月爲朋字朋同類也在易咸之九
四憧憧往來朋從爾思君有大志異日必應以光明之象二人愈
相契合後有謝公達朱秀仙陳十一湖州人賣筆者周雄山東人
軍犯孟州銅匠王秀金與繆元趙啓共八人結爲兄弟分作八卦
久之啓曰我輩結生死交以期久要如今髮逆遍江浙倘有分離
日當以何物作憑座有一人起而答曰我有一物卜之於神可乎
適錢倉宮演戲作對金錢衆曰可也兆適相合於是取康熙錢十

六文將滿字向內上下釘以二鉉繫以辦綬藏在衣襟年年於此日設宴演劇人皆艷稱之無賴子弟歸者益衆有家財而無勢力者亦多歸之橫行鄉曲道路之人莫敢指其非金錢之勢益張矣平邑北門有歲貢生姓程名杰年七十兩目失明善弄刀筆往依趙啓取錢三千用銅鑄面註金錢義記四字金字用入字不用人字以作記號杰取錢放人皆以五百人爲率多至十餘千文者亦有之其胞姪在營充當百總造假米票壞事平陽知縣翟惟本捕之不得有老胥向翟私語曰欲提此人非啓不可啓與杰正有口角招使之何患不到案使人招啓啓即發土匪三千人燒燬杰屋立縛杰姪到案蓋啓之衆皆拳勇杰之衆均懦弱一聞啓來皆不敢出翟令大喜給以諭單改名團練並犒以牛酒而游手之徒往來瑞平間簧鼓其說托言取錢入會可保身家從者益衆百人一

04008

長名爲保守羽翼旣成叛志愈決武則官弁兵丁文則胥吏差役僧尼亦多附之咸豐末年四月十五將起事潛入瑞城城中入會者約作內應平陽坑有日者謝秀球進而言曰方今時際孟夏早晚禾均未登場况衆兄弟皆務農爲業若此時舉事大妨農工粒食何從而來不如待秋後冬前農事旣畢正用武之候且到處可以劫糧啓納其言於是中止殺牛羊祭天地而已數日以後遍傳城鄉孫渠田侍讀正以廣西學政歸家奉旨在籍辦團人告之曰趙啓係一無賴出身聚衆十餘萬人公有在籍辦團之責啓事至今已六七年矣並無一人被罪恐成尾大不掉之憂孫氏聞言歎曰養癰貽患一至於此今勢已蔓延其將何術以禦之乎卽向縣令及城鄉紳士籌畫方法至半月竟無一人當意者孫氏親戚有曾燕卿者爲人慷慨有智略且家饒資財有友十餘人皆能辦事

卽以治團爲己任十日之後眉目瞭然各處應之者以數十計擇日在隆山寺殺羊設酒共議開局蓋五月初一日也平邑張家堡楊琴溪雷瀆溫子玉兄弟浦西舉人林星樵等應之同舉義旗匪勢少怯林垵富戶陳安瀾者每年糶穀爲仔戶所抑勒彼時仔戶俱入金錢建旂首以禁穀偷漏爲名陳患之欲壓以官勢遣其姪生員大誥向曾燕卿議曾齟齬未決適朱鼎在旁聳之曰何不趁此時最多金以作兵費曾然其說卽使李道初帶團勇十多人差役數人拔其旂桿以歸各仔奔告趙啓啓大怒撥匪千餘攻之勢甚咆哮團勇官役見者皆股慄陳之屋片時被毀一家逃逸婦女抱幼孩膝行而出親鄰扶之過江陳之鬚髮已爲火所焚幾至不免入城卽奔告道府各憲反以兩會相爭目之陳見勢不敵轉謀於內姪武舉游飛鵬鵬前在溫標作把總至台州雇船十隻泊錢

倉口稱入會送啓紅夷大砲子彈二萬啓設宴款待次日台船亦設宴請啓約其至船冀酒半出劍脅降謀洩鵬與啓接戰燒啓屋啓憾孫侍讀爲謀主時時以燒孫氏屋爲言孫氏甚患之調團勇百人分班輪守其封翁素拘謹以防賊原爲地方起見所有伙食均派鄰近居民鄉村力薄口雖應允心實啣恨遂嘖有煩言矣轉派親戚親戚路遠不能日給只得抽減人數至後僅留二十人在團有識者與之言曰近日賊勢方張官不敢捕營不敢勦道府鄰縣又庇護之罪以兩會相爭激成事變恐他日滋蔓難圖也須先函致督撫請其發勦一面佈達情形然後入城至房屋存與不存不必論也未旣趙啓果調匪三千人至安義堡內一和尚向在孫氏爲琴西太僕長子詒穀字稷民者課拳勇陰爲內應匪初到地觀望不敢進迨內應號出放膽入堡馬嶼有一老人年七十餘匪

錯認爲孫封翁殺之安溪有孫氏同姓名奶孫善拳棒三十餘來
孫家聞信與匪鬪殉難死蓋身傷數十刃一切雞犬無留孫氏兄
弟因封翁不肯出屋侍側不去有趙金印與安溪人一鬪一護得
保無恙孫屋被焚匪從此益無忌憚惟少者軍械耳謀入福建福
鼎縣劫軍局取庫銀開禁門出死囚以死囚爲先鋒福鼎縣主逃
至省城在三大憲前哭訴錢匪之叛州縣之縱至此三大憲悉其
詳適鎮軍秦如虎自大營歸在省城三大憲卽匪之謀秦曰錢匪
烏合之衆勦除易耳所艱者軍餉非二百萬元不辦尤有慮者瑞
邑與泰順接壤南通閩省北接衢嚴又有小港名潮至在萬山之
中可以藏垢納汙且與永邑山鄉通永又與處州接境若無兵鎮
守錢匪一敗必求救髮逆禍立至矣速起大兵駐紮溫郡然後分
兵四出可撫可勦或守或戰操縱在我矣兵貴神速不可遊移督

撫納其言卽向洋人借烏洋五百萬元烏洋入中國自此始矣遂
起兵至福鼎爲匪所阻平邑蒲門記名道張啓煊號煥堂因省城
失陷招臺勇閩勇五千人至旂幟馬匹器械一切整齊取道常玉
山至諸暨甫一宿被髮逆偷營軍心遂亂未戰而散槍械盡失所
留者僅二千餘人沿途掠食由台州一帶至南溪駐紮西郭外太
平嶺西風颯颯衣食維艱道府鎮臺欲留以防督郡城又恐兵餉
艱難不敢出口各處團練雖稍有進步而匪勢蒸蒸日上各官長
以兩會相爭爲己出脫混指團練爲白布會加過於孫侍讀兄弟
而外人均莫知也適六月間曠旱太甚廿四社民人到茶山禱雨
道經瑞邑南門外城中士紳恐南鄉人均入金錢閉城不許出東
郭鄉人大怒破城門直入將廿四社神像抬至縣署委而去之次
日南北岸紳耆出爲調停始罷由是文武官員鄉民視匪甚易與

八月廿七夜匪謀從廿四都陸路而來城內兵丁暨武弁奸紳奸民都作內應約四更後內外放火爲號匪擬進自西門城上大砲炮眼爲巨釘所釘入會者皆左袒沙垵等處有驍勇兵丁十八名係百總楊世勳徒弟隱匿楊家約二更後動手城內小沙巷王佛仔者年七十餘矣托言神降其身於集真觀東嶽廟溫元帥前對衆明罵某與某是金錢某與某是保首某家隱匿匪徒速自招之可以免禍遲則神梟其首置缸一隻匿有金錢者速投於江對神立誓云齊心殺賊而已不咎既往半日之間收錢無數蓋當日良民取錢皆爲保身家起見受其愚弄至此正無出脫佛仔所謀適中其隱甚至橋梁道路草坡瓦礫之場棄錢無數至晚卽圍楊世勳屋搜出錢匪十七人登時將楊百總正法餘犯明早待訊次日有一囚被獄吏王金禡其上下衣褲並無一物惟隱見夾腿間貼

一大膏藥掀下內有飛花紙一張上寫姓名住居蠅頭細楷均列入錢會大家姓名屋向門徑圖形縣宰孫氏性慈取原單藏匿衣袖概置不問其保全善類陰德無量矣而匪因瑞城發覺卽從桐嶺至郡城由生薑門入日已三竿永嘉縣暨道府鎮俱不在署劫庫獄并各大憲印信適有台勇數百人紮東門外武弁孫贊清招之入城殺傷四百餘人餘俱逃逸趙啓不能彈壓手梟一人仍如故人人挾金資而走路上珍珠翠玉拾之不盡道府鎮入城始加意守禦兩會相爭之言至此始白矣其入城者趙啓潘英蔡華朱秀山諸人王秀金已於咸豐九年邑人沈渙瀾勸之投誠帶勇至杭城爲髮逆所殺其衆後歸蔡華約計郡城損失不下數百萬大冢財帛珍寶散失於鄉愚之手不知愛惜可勝歎哉然爲主之人一無所得餘反滿載而歸郡城人民爲匪所殺者亦不過數人緣

溫郡入會頗多教以披髮垂手不可執軍械只叫衆兄弟救命惟泰順董子京先生前丁酉拔貢年八十餘罵賊爲賊所殺耳從此以後邑人始知辦民團自衛飭隊伍謹斥埃發間諜派巡查設大小局游手之徒均得食初議招張勇守桐嶺郡城大局稍有把握張獻之名家珍者瑞之四十八都湖石人也少出王石山先生門下與孫詒穀兄弟初係同窗繼同入泮爲人慷慨有膽識六月中旬與余邂逅相遇執予手而言曰大勢至此加之亢旱米價騰貴天現彗星長與天互如一片白雲自東至西懸空數百丈奸民見此景象一經引誘不招自至亂勢成矣我輩將安往乎相與歎歎不置又曰當道光末年大港一路至泰順多設鹽關名曰禁止私鹽實則以盜禦盜我率鄉人除此不遺餘力凶惡者恨入骨髓今聞其皆入金錢明目張膽必欲殺我以爲快本年五月我舉一孫

片時溺之人怪我何忍我告之曰與其見殺於賊不如見殺於己鄉愚不解其故唯唯而退月初我已移家住九都青田劉府君誠意故里也族中人向我問數四我曰舍此就彼何患無立身地耶奚必沾沾焉如鴛鴦馬戀棧作釜內之魚且在城紳衿皆塚中枯骨何足與言孫氏團練亦無可靠不過一紙船耳火焚雨打其骨立見彼時救死惟恐不贍奚暇計及他人乎君雖少年頗有識見以吾言爲是爲否因揮淚而別張有健僕名銀足者膽勇絕倫便捷奔馳向作樑上君子從張改過刻不離身二人相從至五十都僑寓飯鋪適有會匪二人口操閩音兩相答問其人曰我奉趙大哥命訪拿張家珍憾不識面耳張慢應之曰我則識之亦奉趙命而來明早我當與爾分途捕之匪應之曰可是夜三人同宿次早分手而行轉至營前八甲有郭奶媪者鹽關巨寇也入金錢充作保

首酒次大酌曰我今要取張家珍作下酒物張在旁低聲問銀足
曰可敵乎銀足曰無畏即取腰間劍梟其首懸於竿頭負之而歸
且行且叫我殺郭奶媢其首在此三日後定來報復若從我謀可
保無患否則妻子爲若虜矣人皆從其言不呼自來者萬餘人至
湖石伐竹爲城立局於家名敬勝弋溪寓公賈式金先生年七十
餘首出應之泰順金國棟父子木賈也輸糧百石山鄉僻壤至者
以萬計裹糧囊橐不食局米陸續而來各處獵戶善槍彈者有百
數人亦不招而來聲勢大張後三日匪果黑夜來攻至張雞嶺爲
壓排所殺者以千計逼至深潭者亦數百人匪勢大促是日張之
屋被焚張笑曰我今無所累矣嗣後或數日一戰十日一戰雖勝
負未分而泰順一縣不使錢匪與髮逆相接者張一人之力也當
秦如虎兵自閩省起馬至桐山爲匪所阻至十月江南保首與先

鋒許游擊接仗許失利被圍不得脫棄馬而走馬爲保首所獲并
有一小馬數日後小馬死許使人以數百金贖馬匪不允後匪首
謝公達乘此馬出戰聞大營號聲飛跑而去公達不得下馬俱被
獲懸首軍門然匪於此戰雖失公達其餘匪尙揚揚自得轉發兵
至大港攻敬勝局張半路邀之匪大敗追之大日湯舉山下張有
從甥在側與匪暗通張不提防爲伏兵所殺匪不知是張銀足竊
負尸以逃爲匪所覺追而奪之手刃數人銀足鬪死并銀足尸抬
至馬嶼局烹而分食先將首懸於竿頭鳴鑼發喊遍徇鄉村所棄
者下體耳羣匪稱賀均曰我今無患矣所忌者江南楊琴溪先生
耳張死後其夫人與大樹脚許先生同領民團數月事平後其從
甥乃當日下手殺張之人獲之灌油作燭燒祭靈前人心爲之一
快趙啓因張死大港無人掣阻銳意要攻瑞城瑞城一破餘不足

慮矣泰順福建温台處三府可傳檄而定且瑞城僅三百里許衆兄弟一人負一石城可立破一日之間傳聞數至風聲鶴唳草木皆兵城中人人皆自危殷戶暨紳士決意主戰立局於縣庫內名曰大局四隅接濟名爲子局大街小巷逐段分防名爲小局外四隅搬住城內者搭廠遮棚毫無隙地男丁不分老幼老者送茶飯幼者鳴鑼鼓巡城防督不分晝夜女墻五片五人分守一人一更輪流瞭望壯丁司鎗炮持刀叉夜深恐睡則吶喊一聲萬喙齊鳴頃刻間五門傳遍初則燈燭輝煌後則滅燭坐待女墻外畔吊設壓排賊近城脚割繩放下家家門首亦懸燈達旦婦女坐以防奸細又派丁壯數十人手執救火器具巡查救火大局諸公宵旰勤勞首辦事者爲項子石項仲珪項子川林敏卿周小梅管玉成李履甫李癯仙洪叶臣胡桂樵黃卣薌黃漱蘭諸先生盡心竭力巨

細捐資不遺餘力僱台勇數隊陶保登台勇三千孟嶧山安勇四百管寶錠三百趙小羣百人加以曾燕卿之團勇并合地義民日日以攻南岸金浦爲事潮長開船潮落卽回遲則爲沙漲所攔或日攻一次或數日一次或取一二首級或燒民房寺觀取其衣服什物以歸所殺者均非眞匪惟余顯廷帶勇三百人與之大戰略有兵法自此以後兩岸人民雖至戚變成仇讎將近半月各司事與陶保登商議攻敵方略陶在大營著名驍勇嘗登隆山瞭望形勢因曰此地難以用武後無繼者全軍難保須紮營另有兵接濟可戰然紮營非易事繪輿圖擇險要用大船數隻泊江邊接濟否則難以退步人皆笑其言迂闊促陶戰陶不得已應之曰姑試之分其勇爲三隊招管勇在北岸以壯聲勢陶上岸且戰且走至鐵鑪地方大局中不備船隻管勇無船不得渡陶潑馬欲回保首王

成煥嶼頭人向作蔡華廚傳出攔陶馬陶擊以洋鎗立斃取其首懸於馬鬣馳至衙衙將近船馬臀幾爲匪長矛所及陶之馭引馬首捉之入船馭一跌足卽爲匪所殺人皆惋惜之陶亦時爲流涕次日陶卽拔隊去與東門人曰大局中諸公踴躍辦公不避勞怨然徒有其表以實心行實事者惟黃君兄弟用兵最要在民心民心不固城郭山川不足恃至於勦辦一節當別尋門徑若朝去暮回決非取勝之道諸君努力行之萬不可以千百萬生靈作兒戲耳卽拔隊而去安勇亦隨之行所留者管與趙數百人而已匪聞大隊已去時時侵軼我或夜用大棹數張四足向上縛燈四盞或用板四粒上插燈牌寫告示數張順流而下城頭望見誤以爲賊船夜至人心皆爲之驚慌後數日雇石紫壘船四隻而至以城中無船禦敵如入無人之境賊船一至鳴金吹角放炮揚旂大彈過

女墻似鵠鈴飛過至衙衙對橫一字下錠城中人人危於累卵東山保首潘煥申等引匪過江上至焦石下至東山三埠晝夜數日不絕五門圍住不開人以專心死守自期又缺火藥幸郡城聞風雇小船一隻內裝火藥沿夜送下以匪立脚未定黑夜偷入城內人心稍定自集雲山以至梅頭無地無匪無屋無賊奸淫擄掠莫可言狀河鄉團練盡爲冲散團總四處奔逃家屬寄寓親戚奸民益自得矣相遇卽稱兄弟包紅巾挂腰牌入會之家視家財上下以取資間數日送牛酒柴米以取媚悅出入床第全無禁忌未投者抱頭鼠竄而逃深林密樹墟墓之間無處不有團練人踪跡趙啓蔡華兄弟紮隆山寺其餘莘塍以下皆分局坐守東門外有開設布莊藥店者二人一名匯成奶一名大全羽領匪數千繞城四掠先至東門將家家房屋任意燒燬西門外花園橋瓦窰底百歲

坊等處爲廿四都保首名大貴者所燒計三晝夜火光不斷天日爲之變色黑烟迷目狐城壁立城外一空雖大帥出清野之令不過如是次日五門環攻不分晝夜蔡華下令速將石紫巖船中紅夷大炮移至隆山放向城內彈從空飛城而過或墮半空或落半港或過西門或至橫山十日之間落城內幾彈而已並無傷人惟初四日午刻有老人年七十名大光在城堞食飯頭被大炮飛去一半腦漿擲地餘被鎗炮傷斃者僅五人耳彈過半空其聲叻叻如犬吠雲中廿七夜攻埭頭城上滅燭以待暗備鎗炮俟匪近城鎗炮齊發鉛彈如雨肉飛骨碎者無數得全尸者百不有一西門百歲坊外有塘隣海匪謀掘之洩水城內以便附城攻擊城上大炮攻之不及掘適有陳府廟建在高炮臺上衆對神祝曰若得洋藥卽原炮可到廟前有動不掀石一看下有洋藥四十包不知誰

人藏匿取以應用擊死者數十人餘則負畚而逃人皆以爲神力所致廿七晚將董場官負之隆山寺逼贖爲通匪之蔡廷富保去廿九日將城隍司神像移至隆山宮十一月初一日匪搜河鄉軍器并競渡龍舟十數積以草柴欲燒水門爲兵丁蔡慶緒所見徒手馮河口啣火草盡燒其舟城中日望救兵全無消息精道府總兵已發兵五千使葉游擊統軍出城約五里許卽紮白塔寺浹底不敢進兵前隊百餘人船至塘口未過橋適有村童十多人在浹頭頑耍持竿捕鴛各相爭奪跳舞官兵錯認作錢匪回船逃避不敢過橋城中日望救兵未至衆目欲穿初三夜衆議誰人敢去乞兵予與孫稷民曾燕卿三人縋城而下分三路而走夜行晝伏三日始至郡城約同鄉鄭寶麒號昭甫邀在郡數十人遮道喊叫擁至道署薄暮時衆皆散去僅留三人哭泣聲啞淚盡血出二日

夜道憲雖口許火速發兵而帶兵官畏蜀如虎終無決意進兵幸孫侍讀兄弟往東門外東和棧中棧主與廣艇鄭碧山相善鄭曰與我七千元當代解圍城孫於親戚處借來光洋三千元鄭即解纜起旋駛至瑞港錢匪在隆山寺望見煙波漂渺中似有大船數十隻揚帆啣尾而至恐大兵水陸並進有懼意先是已有人在外傳言謂孫太僕曾作琉球教習此時借兵琉球矣匪益疑懼無法蓋匪攻城十日多方設計多方禦敵予所目覩初二以後出城請兵不知底細至初六日午刻舍舟登岸問後四日之事不能盡道其詳別有黃通政錢虜爰書可考而彼時河鄉居民遙聞下海大炮聲響又望見陸軍旂幟各各反正晝白眉爲號盡殺錢匪上望林春輝富家也曾入金錢反正時匪匿樓上空櫃中官兵搜尋不得奈以匪心驚櫃動卽被衆搜出梟首後春輝以藏匿錢匪受控

罰洋三千元入都丁田張時葵黠人也初結連環會與民團不洽及錢匪渡江亦爲衝散其胞弟時亨平日機詐無倫紀葵甚惡之後入錢會設局聚星書院反正之日亨在局酣眠未醒葵執之獻於官兵殺之縣署前當錢匪過江時正值農隙各地游手者附之在外擄掠迨縛賊免勦示出狡獪之徒均以強凌弱以衆欺寡單弱孤身異地寄居者多被冤枉執以送官間有能言者送至半路殺之以獻卽有送至縣署不待官研訊卽付斬蓋無罪而殺有罪而逃冤獄無過於此又聞錢匪敗時朱秀仙所帶精兵五千人執黑旂衣黑衣自號鴉軍爲首者一老教習名成開年八十餘同一徒弟足纏紅布兵敗且戰且走至董田爲地保陳昌吉陳學清阮阿七阿沛等圍住不敢動手被昌吉等殺死朱全軍覆沒投河自盡首級爲陳學清割之以獻合城義民開門出戰生縛匪犯赴小

較場正法者八百多人河鄉自鮑田至九里殺死者約計二萬有餘小船渡江爲廣艇炮擊而沈者亦數千人當廣艇至東山時每船開大炮五聲東山賊巢盡數逃脫如蜂出桶於是晝江分守不敢出戰趙啓見兵勢日促於嶼頭局假託一丐者扮作女神戴鳳冠披蟒玉下仍赤足高踞神座口唱閩曲呢呢喃喃以蠱入會者之心僞言江西垵兌字號兵將至從者須先薙髮名爲羅漢陣渡江可不用船踰城可不用梯鄉民各受其愚後兵敗逃回被殺者千餘人均是和尙一般塘頭老童生許作高獻蚣蜈梯不合作法臨用礙手脚初六日天將明偷靠西城匪衆相爭有童子聞而喊叫衆起放手吊排大石滾下搗碎數人西門健勇名阿李跳下追殺匪大敗而去約一時許人皆反正時張煥堂官兵所謂閩勇台勇漸漸逃回約計三千多人瑞安大局諸公向郡謂張駐紮隆山

一帶以預防河鄉匪患張曰隆山孤淺非屯兵地也若要翦除此賊須由陸路廿四廿五都一帶直上至水淺港狹處方可渡江行至澄頭曰可矣卽紮營祇陀地紳皆擁護之作小船二十隻每隻可容二十人船頭安大地傍挂網衣順風張帆無風用楫調綠營兵以實之自澄頭渡江紮仙降隔江民心稍定一都團總吳一勤帶民團五百人紮祇陀派地民供午飯地民暗約金錢忽從山後潛出各勇正食午飯身無寸鐵一時不知所措被逼入江者百餘人在城團總孫松濤跑至江邊向兵船求救後枕爲匪所殺過半戰兵吳國榮負之落船醫愈隻手殺退賊匪其餘三百多人相慶更生皆孫之力也前秦軍深聞髮逆已在處州離温州不遠因在桐山力戰不能斬關而過雷瀆温子玉兄弟合家投河自盡一地房屋焚掠無存餘兵四處奔逃無人敢收秦兵至境投作向導

秦鎮與衆約曰我探髮逆已在處州將至永嘉一二日間可抵瑞境若不速渡事不可爲矣卽於是夜祭告天地次早着雷瀆人俱用白旂漫山遍野逢有林木叢雜處挾柴放火以壯軍威又命登高山吹角與匪大戰彈落藥桶火焚旂亂雷瀆人析屋作排秦兵因是過蕭家渡該處有村名林畧有大河尸浮河面過河且不用舟楫秦卽使許胡二游擊先至平城以看情形若眞實被逼指望官兵惟恐不速至者當插紅旂若假意請投心懷反側者插黑旂秦鎮渡江至江西洋遞呈者遮道但揮之使去而已不與計較至城見十里外均插紅旂轉至瑞囑隊伍不許入城曰此義民也不可驚擾由城外沿河而去至郡分兵四守居城不許出城只許進城民心稍定次日髮逆果從太平嶺而來至正月三十日纔到西郭大橋頭自午至申放火燒燬西郭民房從此一空後謀者來云

賊渠兩股大人在某處攔去者某與某也其麾下大半是舊人秦卽招兩渠登城相見跪而泣曰我豈願如此誠無奈耳秦曰爾等到此要投乎要戰乎要去乎答曰戰則不敢投則不能三日後我其去矣但我去後平邑人姓白名承恩行三人皆呼爲白老三封通天王所領人馬約計有七百里連營大人須格外提防之秦兵自正月初一渡江由蕭家渡至平邑賊勢日挫各保首均逃遁敬勝局義民攻大日破之金谷山各強人均避匿雪篁竹亦來投誠上下港由此路通嶼頭匪局闐其無人張道受匪賄賣死牌衆匪果持此牌由白沙嶺去投髮逆卽引髮逆至瑞趙啓藏破棺中沙垵保首林福瑞作孝子後從二婦人披麻執杖送喪天未明過嶺破棺而出周雄孟州各逃回本地陳十一與童人爲秦鎮以鐵絲穿鼻孔牽至大營殺之蔡華蔡琴扮作後臺脚色至寨下討轎

爲土人所覺擡至永嘉太守所太守黃氏登時殺之頭未落地手足先割蔡華咸豐辛酉科張學憲所取拔貢生後至平邑江西洋拜客索金不盡起色去拜趙啓啓厚贈之又爲華討宿債收者數百元遂成莫逆之交邀華入會華曰邀我入會當與諸君並否則我不爲也衆曰可將金錢義記字內拆出一字華曰人生當以義爲主我解義字上八中王下我是八王都歸於我衆拍案稱奇卽以王秀金部下歸於蔡華華之入會自此啓旣脫身轉投髮逆爲作向導大日金穀山雪篁竹沙垵馬嶼等處家家留住髮逆與居民爲仇煥堂名啓煊雖號巴圖魯其兵勇見匪卽膽喪紮營桐嶺正食午膳繞山踰嶺無處不是賊兵張割斷馬繩騎馬卽走兵勇魂飛魄散棄寨盡逃一切糧食帳房爐鍋炮衛火藥盡爲賊有僅帶本身器械隨張而行奔至城下繞城呼叫城上義民不肯放進

只得紮城外三港廟次日髮逆先鋒騎二馬繞城探營至滴水巖爲老兵陳洪泮擊以火鎗中馬前脅馬至橫山陡門而死髮逆攻城不分日夜聲東擊西虛排陣勢港鄉地民仍處處從逆遠至金華近自橫山足有七百里之遙白聲言只有騙賊無有攻城之理日夜思索總要城破始息隆山寺寶塔亦匪所焚旣閱三月接戰者不止數百次初孫稷民先生名詒穀所帶九里薛里團勇五十人辦匪認真靡有子遺以髮逆大至時將清明人人俱欲歸耕轉換湖石人心意未洽在潮至遇髮逆卽去挑戰未識陣法甫出戰用童子數十人執小旂在陣前踉蹌舞招呼笑罵人人不知何故稷民見之持予趕入小隊俱無踪跡追不半里兩邊夾陣而來漫山遮野都是大旂後接馬隊蒼黃昂首螺角悲鳴喊聲震地見之者無不目迷心亂湖石團丁不知躲身何處孫曳矛而走至光照寺

左邊回顧衆人僅九里二人依依不肯去遙見大漢肩負大刀走至孫旁劈頭一刀刀落頭破二人在側一被殺一逃回餘則無所傷矣後三日生回者竟知死所尋尸負歸髮逆從後追趕至廿五都潘埭老屋基內藏尸殞殮次日匪分二隊攻城橫山雙山直至西門外一路虛張聲勢旂旆飛揚人竟無幾北門大隊從集雲山十二盤下至本寂寺前直攻北城城中義民有臺勇台勇及綠營兵丁出城擊賊協憲黃載清乘小駟帶兵勇迎敵至河埭橋路逕生疏馬陷泥瀟義民從後趕上用長矛擡馬馬隨勢躍起黃未上馬賊已至以火筒燒馬鬃黃以洋鎗擊斃二匪後又有籐牌二扇追上黃又擊之首級爲勇所取黃懸二匪首級於馬鬃而歸自集雲山直上至廿四五都并桐乾陶山潮至等處匪局相聯火光燭天金鼓螺笳聲聒耳不絕叛者如蟻附羶如魚啣尾日以搜山劫

寨爲事婦女攔入局中不分老幼貴賤姦淫慘毒莫可言狀數男一女輪流更換死則擲尸於路嬰孩棄者呱呱啼泣耳不堪聞馬蹄亂踐死無全骸赤子何辜一至於此可勝歎哉間有逃回者言其事有識深爲憂患恐日久人心懈怠賊乘虛而入斗大孤城必定失守郡城雖有大憲無可倚托民團無遠識不可久持戰勝則驕戰敗則散難以節制正在躊躇未決之時幸林敏卿先生等到閩請紅單船未至適有鎮軍吳鴻源號春波領紅單船七十多號至瑞東南風大作一日夜卽至瑞港泊鳳凰洋適有鹽船數艘引之入港甫下旋炮聲轟烈如雷震耳黑煙彌漫不辨南北髮逆聞聲登高瞭望嘆曰此城三面臨江今舳艫相接西南一帶可保無虞惟東北兩門陸軍足以自衛我真空來矣張煥堂兵紮仙絳見髮逆大隊遠來欲下船逃避舉人林夢楠手把張袖大聲曰大人

兵紮此地一切供應刻不容緩今見賊未戰而逃我有何面見地方百姓乎死則俱死戰則俱戰張曰民團助我可以一戰林於是星夜往調民團沿江南北均受約束罄數而來初更動身天尚未明已至馬嶼綠營兵屯在塏下臺閩勇屯在河西民團從東路而進各排陣勢尙未交綏有後姜人手執鐵鉞江上人手執鋼叉奮勇直入賊渠用大旂自上蓋下二人伏進攻其下體賊卽仆地人皆從之而進賊兵大敗紹興有蓮蓬會之首拔貢出身人皆目爲何公子所統賊兵先敗人見易摧爭先擁進賊兵大潰獲馬數十匹武生李石鳴亦獲馬五匹并何書笈包囊盡獲笈內尙存拔貢卷詩賦各草見者無不笑倒生擒者七十多人攔入雲江者亦以萬計江水爲之不流浮尸隨潮上下舟楫爲其所碍其大股髮逆白承恩所領者尙屯潮至一帶千總項國榮號麟甫戇直人也帶

精兵百人紮雷橋雷橋形勢上靠山中多竹下臨江橋束其中過橋以來一片平垸無處屯兵項兵屯橋西疊牌架鎗以待手執長刀大聲喝令誰若回頭我斫以刀今日之事有死而已白拉馬揚鞭正欲過橋項擊以抬鎗正中胸膛翻身落馬從匪搶其尸以走馬隨後逸此巨魁也乃竟一鎗擊死誠非易事功爲大力者所冒豈不冤哉餘匪見白已死卽拔隊盡去自潮至起程至大港經營前由大嶼過大回嶺到青田九都山寓誠意伯祠中賊未戰時衆卜於神戰乎避乎神不許戰賊至衆避山後匪入祠投宿至夜半賊衆縱博失一銅盤落地轟然衆皆驚潰自相蹂躪所殺過半天明始覺左右兩旂分途而走左則自九都至金華右則仍轉至潮至紮山底後爲秦軍所困勢促投秦爲秦所滅從此錢匪勢窮漸漸爲髮逆所殺惟趙啓轉竄至玉環身伴僅五人玉環參將鍾周

泰有親兵在茶館過沙坪保首林宗啓問之汝在此何爲答曰從趙啓到此啓今財窮勢促君能救我否若能救我我當告汝以啓之住處兵卽以其言告鍾鍾曰速投誠可救爾命若啓則無赦矣次早卽圍其室啓從後樓跳出失足浮田足陷泥瀆爲鍾之三子刺以長矛透脅幾斃殺之以獻後功爲知府周開錫所冒當咸豐初年髮逆起事廣西後至南京草澤英雄不招而至者甚多白承恩名老三依湖海算命之徒投入髮逆夜夢神告之曰爾命有封王之分日後若有地名桃花不可亂過過則有損白意早欲歸家晝隅自守感於神言不敢過桃花嶺迨錢匪招之引入金表山由白楊山經諸暨至處州入南溪過瞿溪至潮至入瑞小港自此以爲師從天降何快如之不料雷橋以上地名桃花坪卽土人亦未盡知其名竟死於此足見數皆前定也永嘉上河鄉有后嶼堂堂

內藏經半藏係前明張相國代請匪經其地盡爲散失或扯碎或踏破飛揚田野之間遺落廁溷之內見者皆曰佛若有靈其將如之何初六反正之日錢匪敗績綁至小較場正法者尸皆狼藉未收彼時雖值冬令穢氣觸鼻不可言狀大家畜狗以多食人肉各顛狂逢人輒噬局中諸公欲以前棄攻城龍舟舁至江邊尸積其中俟潮落風順乘流推去送至南岸憑南岸人如何發落衆皆然其言惟陳介石先生先大父在側聞衆言卽曰此計非也罪無重科旣已正法何必狼藉尸骸不如擇一地葬之如古人京觀之狀以示後人可乎否乎衆從其言費洋八百多元埋於小東門外江邊江蟹埠之上近日陳氏科第鼎盛豈非此翁陰德所致耶事平之後秦在溫郡鎮守三年秦去吳仍一切善後事宜均二公所辦溫瑞數百萬生靈得保太平之福者均二公之力也張獻之先生

事雖未成身死戰場其功力豈鮮張煥翁雖云同辦則無所事胡
矣下此兵民著有勞績者如蔡慶緒吳國榮老李等可謂義兵專
載順趙賦槐等可謂義民矣蔡華之父名觀禮性情乖僻無惡不
作天厚其毒俾二子一廩一貢聲名赫赫後以小利入會斬宗滅
祀遭此大劫何其慘也若陳公則一念之善受此大福可謂得爲
善之報矣予年已七十餘錢髮之變目覩耳聞迄今四十多年若
過此不言則終無可言之日矣若云禮失求諸野則吾豈敢若實
事求是據實直書庶乎近耳所恨者事繁筆冗詞不達意舉一漏
百問心多慚至於起衅之由激變之故孰是孰非孰功孰罪不敢
贅述閱者當自知之

通志